

宋史新編

下 禮志

第十



漢書門			
八	八	二	九
一	六	七	九
六	五	四	冊
冊	架	函	號

內閣文庫			
六	八	二	九
一	六	七	九
六	五	四	冊
冊	架	函	號

內閣文庫			
番號	漢	8829	
冊數	65 (11)		
函號	286	78	



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19




© Kodak, 2007 TM, Kodak





宋史新編目錄合卷十
卷二十八

志十四



禮三

尊號之典	冊皇太子	冊皇太后	冊皇太子妃	冊皇后
冊皇太子	冊皇太子妃	冊皇太子	冊皇太子妃	冊皇太子妃
聖節	諸慶節	三元觀燈	宴享	曲宴
游觀	三元觀燈	宴享	曲宴	賜酺
巡幸	御明堂	養老	肆赦	
視學	賜貢士宴			
幸祕書省	進書儀	大射		
鄉飲	皇太子冠	皇子冠		
公主笄禮	公主下降			
諸王納妃	臣庶冠婚禮			
大朝會	常朝之儀	入閣儀		
皇太后臨朝儀				
皇太子正至受羣臣賀儀				
皇太子與百官相見儀				

宋史新編目錄合卷十

朝儀班序
百官相見儀

百官轉對
錄周後

錄先聖後
羣臣朝覲出使宴餞

朝臣時節餽廩
契丹國使入聘

外國君長來朝儀
金國使入聘

夏國使入貢

諸國朝貢

卷二十九

志十五

禮四

禡祭
田獵

閱武
打毬

受降獻俘
救日伐鼓

山陵

皇后園陵

秀安僖王園廟

濮安懿王園廟

上陵之禮

莊文太子喪禮

外國喪禮

外國弔喪
輟朝之制

諸臣之喪
舉哀掛服

輟樂
士庶人喪禮

聘贈
臣為君服

定謚

丁父母憂
子為生母服
嫡孫承重

子為嫁母服
婦為舅姑服
雜議

宋史新編卷三十八
以鴻儀昭舉保命會昌迫於羣情祗膺顯號退循寡昧
惕懼增深儀節多不錄禮畢有司奉冊寶詣閤門進入
內神宗初立宰臣曾公亮等上表請加尊號詔不允先
是翰林學士司馬光言尊號起唐武后中宗之世遂爲
故事先帝治平二年辭尊號不受天下莫不稱頌聖德
其後佞臣建言國家與契丹常有往來書彼有尊號而
中國獨無足爲深恥於是羣臣復以非時上尊號論者
甚爲朝廷惜之今陛下在亮陰之中考之事體似未
宜受詔賜光曰朕方以頻日淫雨甲申地震天威彰著
日虞傾禍被此鴻名有慙面目况在亮陰亦難當是盛

典今已批降指揮可善爲答辭使中外知朕至誠慙懼
非欺衆邀名後宰臣屢請終不允徽宗高宗內禪並稱
太上皇帝孝宗下禮官議援漢高祖故事五日一朝德
壽宮太上限朝朔望復下有司議每月朔望及初八二
十三日詣宮起居孝宗光宗內禪並如之靖康時道君
冊禮中輟孝宗初上德壽冊文依母后稱嗣皇帝乾道
六年周必大援唐憲宗故事定議稱皇帝
太皇太后皇太后冊禮天子稱嗣皇帝餘槩如尊號儀
皇太妃亦有冊禮多不果行

冊立皇后建隆元年立王氏爲皇后命所司擇日備禮

宋史新編卷二十八
冊命自後凡制書云冊命者多不行冊禮后妃皆寫冊命告身有司進入學士院草制宣於正殿近臣牧守宗室皆修貢禮群臣拜表稱賀又詣內東門奉牋賀皇后真宗冊劉皇后不欲令藩臣貢賀不降制止命學士草詞付中書仁宗冊曹皇后冊制如皇太子玉用珉寶用金文曰皇后之寶禮與通禮異元祐五年八月哲宗將納后太皇太后詔檢詳古今六禮沿革參考通禮典故具爲成式群臣又議勘昏御史中丞鄭雍等請不用陰陽之說呂大防亦言不可從之七年四月以尚書左僕射兼門下侍郎呂大防等並攝太尉充六禮使同知樞

密院事韓忠彥等副之事在孟后傳五月甲午行納采問名禮丁酉行納吉納成告期禮戊戌帝御文德殿發冊及命使奉迎主人謂后曰戒之戒之夙夜無違命母施衿結帨曰勉之戒之夙夜無違命禮成擇日詣景靈宮行廟見禮大觀四年冊鄭皇后議禮局重定儀注損益開寶禮其朝謁景靈宮止依近例紹興十三年冊吳皇后亦異元祐儀

冊皇太子至道元年立真宗爲皇太子命有司草冊禮有司言前代無太子執圭之文請如王公執桓圭餘如舊制有司又言唐禮宮臣參賀皆舞蹈開元始罷之故

事百官及東宮接見祇呼皇太子。上牋啓稱皇太子殿下。百官稱名。宮官稱臣。常行用左春坊印。宮中行令。又按唐制。凡東宮處分論事之書。太子並畫。令左右庶子以下署名。姓。宣奉行書。按畫日。其與親友師傅。不用此制。請如開元之制。宮臣止稱臣。不行舞蹈禮。今皇太子兼判開封府。所上表狀。卽署太子之位。其當申中書樞密院。祇判官等署。餘斷案及處分公事。並畫諾。詔惟改諾爲準。餘並從之。神宗未及受冊。卽位乃以冊寶送天章閣。遂爲故事。孝宗冊皇太子。受冊之三日。當謁廟。皇太子言。設仗乘金輅。雖有故事。非臣子所安。詔免。

冊皇太子妃。真宗爲太子。性謙慎。凡官僚稱殿下。冊妃皆乞寢罷。太宗嘉納之。故章穆終太宗世。止爲夫人。欽宗升儲。議禮局上冊妃新儀。乘金輅親迎皇太子。三奏辭乘輅。及臨軒。冊命詔免乘輅。而發冊如禮。

公主受封降制。有冊命之文。多不行禮。惟以綸告進內。嘉祐二年。封福康公主爲兗國公主。始備禮冊命。其冊印如貴妃。有匣文曰兗國公主之印。遂爲定制。

冊命親王大臣。具開寶通禮。雖制書有備禮冊命之文。多上表辭免。未嘗行政和禮局。上其儀。迄不果行。

聖節立名。自唐千秋節始。宋因之。皇太后臨朝。亦立節。

名餘則否太祖長春節先一月於大相國寺建道場祝
壽至日上壽退百僚詣寺行香尋詔今後長春節及諸
慶節臣庶毋得進奉累朝儀注微有異同有故則罷上
壽仁宗定皇太后上壽儀皇太后垂簾崇政殿宰臣進
酒奏曰長寧節臣等不勝歡忭謹上千萬歲壽皆再拜
內臣承旨宣曰得公等壽酒與公等同喜皆再拜舞蹈
太后還內百官拜表稱賀內外命婦上壽如百官儀隆
興初孝宗詣德壽宮上太上皇帝壽皇帝奉酒奏臣某
謹率文武百僚稽首言天申節臣某與百僚等不勝大
慶謹上千萬歲壽宣答曰得皇帝壽酒與皇帝拜百僚

內外同慶餘儀如皇太后淳熙二年十一月詔太上皇
帝聖壽新歲七十以冬至加上尊號冊寶十二月某日
立春行慶禮其日依大禮例用四十八架樂正樂工用
一百八十八人百僚簪花赴文德殿聽宣赦訖從帝至
宮上壽稱賀車駕往還並張樂珥花備極情文十三年
壽八十元日帝率羣臣詣宮行禮如前儀
諸慶節真宗時始有之大中祥符元年詔以正月三日
天書降日為天慶節休假五日兩京諸路州府軍監前
七日建道場設醮斷屠宰節日士庶特令宴樂京師然
燈又以六月六日為天貺節又以七月一日聖祖降日

爲先天節十二月二十四日降延恩殿日爲降聖節休
假宴樂竝如天慶前日以延壽帶續命縷分賜百官
節日戴以入禮畢宴於錫慶院天禧初詔以大中祥符
元年四月一日天書再降內中功德閣爲天禎節尋改
爲天祺節避仁宗嫌名也政和三年十一月五日以天
眞示現日爲天應節又以五月十二日祭方丘日爲寧
祝節又以二月十五日太上混元上德皇帝降聖日爲
眞元節八月九日青華帝君生辰爲元成節正月四日
有太祖神御之州府宮殿行香爲開基節十月二十五
日爲天符節皆如天慶節著爲令南渡後其禮多輟獨

外郡猶詣天慶觀朝謁遂休務至前後各一日洪邁謂
其敬事司命過於上帝爲非禮云

宴饗凡春秋季仲聖節郊籍禮畢巡幸還京及國有大
慶皆大宴遇災則罷其日殿庭設山樓排場爲群僊隊
仗六番進貢九龍五鳳之狀宰相以下升殿進酒各就
坐酒九行更衣賜花有差太平興國後止設春宴淳化
四年直史館陳靖上言宴以禮成賓以賢序風雅之作
茲爲盛焉其有拜起失節喧譁過甚及執事者失於察
視宴饌不及潔豐竝申嚴制後御史中丞李昌齡亦以
爲言竝從之咸平三年始備設春秋大宴五年以翰林

學士梁顥請春秋大宴小宴賞花行幸次為四圖頒下
 閣門遵守景德以後屢申諭儀制委御史大夫以下察
 視彈奏故事大宴前一日御殿閱百戲謂之獨看哲宗
 初立范祖禹言是日進神宗紀草即觀百戲理似未安
 詔罷獨看元祐三年罷春宴又罷秋宴以魏王出殯翰
 林學士蘇軾不進教坊致語故也大觀三年議禮局上
 集英殿春秋大宴儀紹興中詔宴殿陳設止用緋黃二
 色不用文繡令有司遵守更不制造遂更立儀注乾道
 八年詔今後惟正旦生辰郊祀及金使見辭各有宴慶
 元間昇平日久京尹趙師彛請排設春宴倣唐曲江遺

意即於行都西湖用舟船妓樂自寒食前依品秩排日
 宴會竝京尹館伴李澄為尹復奏舉如前開禧以後兵
 興及追擾百色行鋪為民害不復舉矣

曲宴凡幸池苑觀稼畋獵惟從官預謂之曲宴暮春後
 苑賞花釣魚則三館祕閣皆預雍熙元年三月十五日
 詔近臣賞花後苑各賦詩帝習射水心殿二年四月二
 日賞花釣魚始有曲宴仍賦詩習射咸平二年二月晦
 宴後苑帝作中春賞花釣魚詩儒臣皆賦因習射盡歡
 而罷自是為定制皇祐五年後苑寶政殿割麥帝謂輔
 臣曰朕新作此殿不欲植花歲以種麥庶知穡事不易

自是觀稼就後苑春夏賞花釣魚則歲為之嘉祐七年十二月召兩府等官再會天章閣觀三朝瑞物復宴群玉殿上曰天下久無事今日之樂與卿等共之宜盡醉勿復辭因召韓琦至御榻前別賜一大卮出禁中名花金盤貯香藥令各持歸莫不露醉熙寧後凡實錄國史成俱宴垂拱殿大觀議禮局上垂拱殿曲宴儀又有上巳重陽賜宴儀

游觀天子歲時游豫則上元幸集禧觀相國寺御宣德門觀燈首夏幸金明池觀水嬉瓊林苑宴射大祀禮成則幸太一宮集禧觀相國寺恭謝或詣諸寺觀焚香或

至近郊閱武校獵觀射觀稼其事不一其校獵觀射觀稼往往賜武士農夫織婦錢帛及父老飲食云

三元觀燈本方外之說唐以後常於正月望夜開坊市門然燈宋因之上元前後各一日城中張燈大內正門結綵為山樓影燈起露臺教坊陳百戲天子先幸寺觀行香遂御樓或御東華門及東西角樓從臣預宴四夷蕃客各依本國歌舞列樓下亦賜酒食勞之東華左右掖門東西角樓城門大道大宮觀寺院悉起山棚張燈樂皇城雉堞亦徧設其夕開舊城門達旦縱士民觀遇籍田及兵喪災變則罷乾德五年詔開封府更放十七

十八兩夜遂爲例徽宗窮極宴樂宣和六年之事見五行志若中元下元張燈自淳化初詔廢罷矣

賜酺自秦始秦法三人以上會飲則罰金故因事賜酺吏民會飲過則禁之唐嘗一再舉行太宗雍熙元年十月二月詔賜酺三日帝御丹鳳樓觀酺召侍臣賜飲自樓前至朱雀門張樂作山車旱船往來御道又集開封府諸縣及諸軍樂人列於御街音樂雜發觀者溢道縱士庶遊觀遷市肆百貨於道之左右召畿甸耆老列坐樓下賜之酒食明日賜群臣宴於尚書省仍作詩以賜又明日又宴群臣獻歌詩賦頌者數十人真宗時累賜京

邑及東封所過州府父老觀酺錫宴皆如舊儀天禧五年詔開封府賜酺日罪人酗酒而不傷人者咸釋之再犯論如法宋之繁庶於斯爲盛後遂爲定制

巡幸唐開元禮有告至肆覲考制度之儀開寶通禮因之太祖幸西京所過賜夏秋田租之半真宗朝諸陵及舉大禮所過賜兵卒時服錢履父老茶帛吏民有以饗餼酒果方物獻者計直答之命官籍繫囚逋負引對多原釋仍採訪民間疾苦振恤鰥寡孤獨車服度量權衡有不如法則舉儀制禁之有奇材異德若政事尤異者孝子順孫義夫節婦爲鄉里所稱者其不守廉隅昧於

正理者並條析以聞凡巡省東京舊城城門西京皇城
司並勘契內外城宮廟門並勘箭出入皆然入藩鎮外
城子城門亦勘箭
御明堂徽宗始建明堂禮制局上七議一曰古者朔必
告廟示不敢專請視朝聽朔必先奏告以見繼述之意
二曰古者天子負宸南向以朝諸侯聽朔則各隨其方
請自今御明堂正南向之位布政則隨日而御堂其閏
月則居門焉三曰禮記月令天子居青陽總章每月異
禮請稽月令十二堂之制修定時令使有司奉而行之
四曰月令以季秋之月為來歲受朔之日請以每歲十

月於明堂受新曆退而頒之郡國五曰古者天子負宸
公侯伯子男蠻夷戎狄四塞之國各以內外尊卑為位
請自今元正冬至及大朝會並御明堂遼使依賓禮蕃
國各隨其方立於四門之外六曰古者以明堂為布政
之宮自今若有御劄手詔並請先於明堂宣示然後榜
之朝堂頒之天下七曰赦書德音舊制宣於文德殿自
今非御樓肆赦並於明堂宣讀政和七年九月一日詔
頒朔布政自十月為始是月一日上御明堂平朔左介
頒天運政治及八年戊戌歲運曆數于天下文多不載
十一月一日上負宸御明堂南面以朝百辟退坐于平

朔頒政宣和初蔡京言秦以十月為歲首故月令以孟冬頒來歲之朔今不當用請以季冬頒歲運于天下詔自今以正月且進呈宣讀既而王黼編類明堂頒朔布政與詔書條例氣令應驗凡六十三冊上之靖康元年詔罷頒朔布政

養老皇帝幸太學盛輿衛陳樂舞酌獻文宣王三祭酒再拜歸御幄遣使迎三老五更於其第國老庶老有司預戒之皇帝即御坐三老五更服朝服杖而入各左右二人夾扶國老庶老亦服朝服以次入既就坐三公授几九卿正履尚食執醬尚醢執爵史臣錄三老所論善

言善行前後行揖禮皇帝為興焉

肆赦每郊祀畢駕還至宣德門帝登樓肆赦倣前代金雞故事立雞竿於樓東南隅伎人四面緣繩爭上取雞口所銜絳幡獲者即與之樓上以朱絲繩貫木鶴仙人乘之奉制書循繩而下至地以畫臺承鶴舍人宣制百官拜舞稱賀金雞者取天文天雞星明主恩赦也

視學古禮視學多為養老東漢以後特為講經或釋奠故宋制分養老視學為二事累朝屢臨幸謁文宣王畢召儒臣講說從臣賜坐講官監學官諸生賜賚或加恩有差元祐五年哲宗視學詣文宣王殿行釋奠禮再拜

乃御敦化堂講經遂幸昭烈武成王廟酌獻但肅揖而已徽宗改辟雍文宣王殿為大成殿高宗作大成殿成安廟像其視學竝如元祐儀後遂為定制

賜貢士宴州郡貢士曰鹿鳴宴其登第曰聞喜宴或于開寶寺或瓊林苑或禮部貢院或辟雍仍賜花有差政和二年二宴許用雅樂故事御製詩章賜第一人間有遍賜者慶元五年賜曾從龍以下七言四韻詩秘書監楊王休以下繼和以進自後每舉竝如之

幸秘書省太宗於崇文院建祕閣神宗改為祕書省凡臨幸祕書監以下俱有賜南渡建祕書省成祕書少監

游操等援宣和故事請臨幸帝頒手詔勉勵之遂陳累朝御書御製晉唐書畫三代古器次宣皇太子宰臣以下觀訖退遂賜宴于右文殿賜游操三品服館閣各轉一官淳熙五年九月孝宗幸祕書省賦詩群臣皆和進書儀紹興二十年五月八日進呈中興聖統太常博士丁屢明言乞比附進呈玉牒行禮自是凡進書竝倣此惟進太上皇聖政則有詣德壽宮儀

大射之禮廢於五季淳化末始命有司講求儀注凡遊幸池苑或命宗室武臣射帝射中的從官再拜奉觴貢馬為賀預射官中者帝為之解賜襲衣金帶勒馬不解

則不賜苑中皆有射棚節序賜宴則宗室禁軍大校牧
 伯諸司使副皆令習射遂為定制
 鄉飲之禮古者鄉飲有三後世臘蜡百神春秋習射序
 賓飲酒之儀不行於郡國唯貢士日設鹿鳴宴猶古者
 賓興賢能行鄉飲之遺意也唐貞觀所頒禮惟明州獨
 存淳化中會例行之政和禮局定飲酒祭降之節與舉
 酒作樂器用之屬並參用辟雍宴貢士儀既又以河北
 轉運判官張孝純言周官以六藝教士必射而後行古
 者諸侯貢士天子試諸射宮請詔諸路州郡每歲宴貢
 士於學因講射禮從之紹興十三年國子祭酒高闕草

具鄉飲儀上之僕介之位皆與古制不合諸儒莫解其
 指意慶元中朱熹以儀禮改定主賓僕介之位始有定
 說其主則州以守縣以令位于東南賓以里居年高及
 致仕者位于西北僕則州以丞縣以丞或簿位東北介
 以次長位西南三賓以賓之次者司正以衆所推服者
 相及贊以士之熟於禮者知學者皆專用之

皇太子冠儀嘗行於大中祥符八年後徽宗親製冠禮
 浴革十一卷初加祝曰咨爾元子肇冠於阼筮日擇賓
 德成禮具於萬斯年承天之祐次加祝曰爰即令辰申
 加元服崇學以讓三善皆得副予一人受天百福三加

祝曰、三加彌尊、國本以正、無疆惟休、有室大競、懋昭厥德、保茲永命、進爵祝曰、旨酒嘉薦、有飴其香、拜受祭之以定爾祥、令德壽豈、日進無疆、字之曰、始生而名、爲實之賓、旣冠而字、以益厥文、永受保之、承天之慶、復宣敕曰、事親以孝、接下以仁、遠佞近義、祿賢使能、古訓是式、大猷是經、太子曰、臣雖不敏、敢不祇奉、

皇子冠、初加進爵、祝曰、酒醴和旨、籩豆靜嘉、授爾元服、兄弟具來、永言保之、降福孔皆、再加進爵、祝曰、賓贊旣成、肴核惟旅、申加厥服、禮儀有序、允觀爾成、承天之祐、三加進爵、祝曰、旨酒嘉栗、甘薦令芳、三加爾服、眉壽無

疆、永承天休、俾熾而昌、字之曰、歲日云吉、威儀孔時、昭告厥字、君子攸宜、順爾成德、永受保之、又敕戒曰、好禮樂善、服儒講藝、蕃我王室、友于兄弟、不溢不驕、惟以守之、皇子曰、臣雖不敏、敢不祇奉、

公主笄禮、年十五、雖未議下嫁、亦笄、三加祝詞、大略如皇子字之詞、曰、歲日具吉、威儀孔時、昭告厥字、令德攸宜、表爾淑美、永保受之、可字曰、某、又宣訓辭曰、事親以孝、接下以慈、和柔正順、恭儉謙儀、不溢不驕、毋諉毋欺、古訓是式、爾其守之、公主曰、兒雖不敏、敢不祇承、

公主下降、初被選尚者、卽拜駙馬都尉、賜玉帶、襲衣、銀

鞞勒馬采羅百匹，羆之繫親，下降前一日，行五禮，所司設壻次於內東門外，壻父醮而命之曰：「往迎蕭雍。」以昭惠宗，祔子再拜曰：「祇率嚴命。」太宗揚國大長公主嫁節度使柴禹錫，子崇慶，真宗特命主以舅姑禮，謁禹錫，非常制也。神宗卽位，詔遵先帝遺旨，尚主者不許升行，紊倫序。語在英宗紀。自此公主下降，皆行舅姑禮。徽宗詔曰：「周稱王姬，見於詩雅，可改公主爲帝姬，郡主爲宗姬，縣主爲族姬，大長爲大長帝姬，仍以美名易國號。」諸王納妃，王之聘禮，白金萬兩，宗室子五千兩，其敵門卽古納采定禮，納財親迎，禮皆半之。遠屬族卑者又半之。政

和議禮局上，皇子納夫人及諸王以下，皆備六禮。醮命及同牢，廟見，見舅姑諸儀，加詳。父醮命曰：「躬迎嘉耦，釐尔內治。」主人命女曰：「往之汝家，以順爲正，無忘肅恭。」母曰：「必恭必戒，無違舅姑之命。」庶母申之曰：「爾誠聽於訓言，母作父母羞。」治平中，詔壻家有二世食祿，卽許娶宗室女。熙寧末，又禁與卑賤惡逆之家通婚，後又禁刑徒人子孫，須釋三代有任州縣官，或殿直以上者。臣庶冠婚禮，冠竝用三加，品官之于冠服稍別。語在輿服志。婚六禮及諸儀，四品以上，槩如諸王以下。婚四品以下，不用盥饋饗婦禮。士庶人，并問名於納采，并請期。

於納成親迎之服三舍生及官子孫假九品服餘並阜
衫衣折上巾無薦奠者三舍生聽以羊庶人聽以雉及
雞鷩代父母醮命與品官同

周官賓禮有朝覲宗遇會同聘視八者之目所以親諸
侯也政和別朝儀為賓禮於古近之抑周封微子為殷
後作賓王家宋錄柴周及宣聖後亦崇德尚賢意也故
皆為賓禮其餘則有朝使之宴餞歲時之廩餽及外國
之使聘遠方之朝貢并附焉

大朝會宋承前代之制以元日冬至及五月朔行大朝
會禮羣臣稱賀上壽有喪及出師則輟若無事不視朝

則群臣表賀于閣門淳化三年正月朔命有司約開元
禮定上壽儀天聖四年十二月詔明年正月朔先率百
官赴會慶殿上皇太后壽酒畢乃受朝天安殿仍令禮
官詳定儀制熙寧初詔罷五月朔朝賀元豐中宋敏求
等奉詔上朝會儀及令式頒行之大略如天聖朝皇太
后儀致詞曰元正啓祚萬物咸新冬至易為畧運
推移日南長至伏惟
皇帝陛下應乾納祐與天同休答詞曰履新之慶冬至
履長與公等同之群臣奉觴上壽元符元年四月得傳
國受命寶禮官言五月朔故事當大朝會乞就是日受
寶依上尊號寶冊儀後徽宗以元日受八寶及定命寶

冬至受元圭皆于大慶殿稍更元豐儀南渡多故未暇
舉行及紹興十二年十月太后自金還臣僚請正至舉
行朝賀以明天子之尊十一月權禮部侍郎王賞等言
正旦冬至及大慶受朝受賀係御大慶殿其文德紫宸
垂拱殿禮制各有不同月朔視朝則御文德殿謂之前
殿正衙仍設黃麾半仗紫宸垂拱皆係側殿不設儀仗
元正在近大慶殿禮繁乞候來年冬至取旨詔從之至
期不果行十五年正旦始舉行如禮

常朝之儀唐以宣政爲前殿謂之正衙卽古之內朝也
以紫宸爲便殿謂之入閣卽古之燕朝也而外又有含

元殿含元非正至大朝會不御正衙則日見群臣百官
皆在謂之常參後此禮漸廢後唐明宗始詔群臣五日
一隨宰相入見謂之起居宋因其制皇帝日御垂拱殿
文武官日赴文德殿正衙曰常參宰相一人押班其朝
朔望亦於此殿五日起居則於崇德殿或長春殿中書
門下爲班首崇德卽紫宸長春卽垂拱也元豐官制行
始詔侍從官而上日朝垂拱謂之常參官百司朝官以
上每五日一朝紫宸爲六參官京朝官以上朔望一朝
紫宸爲朔參官望參官遂爲定制故事宰相垂拱殿奏
事畢始赴文德殿押班然或日昃未退則閣門傳宣放

班多不復赴及神宗卽位御史中丞王陶以皇祐編敕
押班儀制移中書謂天子新卽位不應壞廢朝儀不報
旣而陶劾韓琦曾公亮不押班爲不恭琦公亮上表待
罪且言唐及五代會要月九開延英則餘日宰相當押
正衙班及延英對日未御內殿前傳宣放班則不押班
明矣自祖宗繼日臨朝宰相奏事至祥符初始詔循故
事押文德班以妨職浸廢乃至今日請下禮官詳定陶
坐絀司馬光代爲中丞請令宰相遵舊制不須詳定尋
詔宰相春分辰初秋分辰正垂拱殿未退聽勿赴文德
殿令御史臺放班光又言垂拱奏事畢春分以後鮮有

不過辰初秋分以後鮮有不過辰正請春分辰正秋分
辰初奏事未畢卽如今詔迺詔春秋分率以辰正元豐
旣定朝參之制侍御史知雜事蒲中行上言百官赴文
德殿宰臣押班聞傳不坐則再拜而退謂之常朝遇休
假併三日以上應內殿起居官畢集謂之橫行應見謝
辭者皆先赴文德殿謂之過正衙然在京釐務之官例
以別敕免參宰臣押班近年已罷而武班諸衙本朝又
不常置故今之赴常朝者獨御史臺官與審官待次階
官而已今垂拱內殿宰臣以下旣巳日參而文德常朝
仍復不廢舛謬倒置莫此爲甚至於橫行參假與夫見

謝辭官先過正衙雖沿唐之故事然必俟天子御殿之日行之可也詔詳定官制所言今天子曰聽政於垂拱以接執政及內朝之臣而更於別殿宣敕不坐實爲因習之誤又辭見謝自己入見天子則前殿正衙對拜爲虛文其連遇朝假則百官同赴內殿起居不當復有橫行參假宜如中行言於是常朝正衙橫行之儀俱罷入閣儀唐制天子日御宣政殿正衙以見群臣必立仗朔望薦食陵寢不能臨前殿則御紫宸殿乃喚正衙仗由宣政殿東西門而入是謂東西上閣門群臣俟於正衙者因隨以入故謂之入閣五代以來正衙旣廢而

入閣亦不講宋復行之太祖御崇元殿入閣者二太宗御文德殿入閣令揚徽之張洎定新儀文德殿卽唐宣政殿也眞宗行者三景德以後廢神宗命宋敏求重脩文德殿入閣儀敏求言紫宸殿與唐同宜御紫宸入閣翰林學士王珪等議閣門所載入閣儀止是唐常朝非盛禮也自是罷入閣敏求又言本朝惟入閣乃御文德殿視朝今旣罷入閣卽文德遂廢視朝請約唐制裁定朔望御文德殿儀以備正衙視朝之制學士韓維等以入閣圖增損裁定詔可

皇太后臨朝儀蔡邕獨斷云漢母后臨朝母后東面少

宋史新編卷二十八
帝西面仁宗卽位幼明肅皇太后劉氏同御承明殿垂
簾聽政寔采漢故事初宰臣丁謂有異議詳見后傳英
宗卽位不豫權居柔儀殿東閣西室慈聖皇太后曹氏
於內東門小殿垂簾處分兩府日入候問聖體因奏政
事退詣太后小殿覆奏帝疾間御前後殿聽政兩府退
朝猶於小殿覆奏哲宗卽位亦幼宣仁太皇太后高氏
臨朝重定儀制每朔望六參帝御前殿百官起居畢詣
內東門進榜子雙日御延和殿同垂簾日參官起居太
皇太后移班少西起居皇帝有祥瑞邊捷帝御紫宸殿
百官稱賀畢赴內東門賀太皇太后慈聖不同御殿不

立生辰不遣使契丹以英宗長君也徽宗卽位帝請欽
聖皇太后向氏同聽政三省樞密院聚議三朝故事會
布以帝長君請如慈聖蔡卞欲依明肅宣仁有旨依嘉
祐治平故事布語同列曰奏事先太后次覆奏皇帝如
今日所得旨遂爲定式矣太后尋手書罷同聽政

皇太子元正冬至受群臣賀儀稱賀致詞云元正首祚

冬至云天景福維新伏惟皇太子殿下與時同休答詞

正至長云元正首祚冬至云天與公等均慶

皇太子與百官相見儀至道元年定兩省五品尚書省
御史臺四品諸司三品以上皆答拜餘悉受拜宮官自

左右庶子以下悉用參見之儀其宴會位在王公上與師傅保相見政和新儀皇太子東階西向再拜師傅保以下西階東向答拜若三少特見則三少先拜大觀二年定王嘉王府侍講沈錫奏請二王出就外學禮儀詔按祥符故事記室翊善見諸王皆下拜真宗特以張士遜為王友命王答拜以示賓禮今講讀輔翊之官職在訓道亦王友傅也可如例答拜

朝儀班序太祖建隆三年有司上合班儀詔曰尚書中臺萬事之本而班位率次兩省官節度使出總方面古諸侯也又其檢校兼守官多至師傅三公而位居九寺

卿監之下甚無謂也其給事諫議舍人宜降於六曹侍郎之下補闕次郎中拾遺監察次員外郎節度使升於六曹侍郎之上中書侍郎之下餘悉如故乾德中詔重定儀制有司請令上將軍在中書侍郎之下大將軍在少卿監之下諸衛率副率在東宮五品之下內客省使視太卿客省使視太監引進使視庶子判四方館事視少卿閣門使視少監諸司使視郎中客省引進閣門副使視員外郎諸司副使視太常博士通事舍人從本品供奉官視諸衛率殿直視副率樞密承旨視四品朝官兼南班官諸司使者從本品副承旨視寺監丞諸房副

承旨視南省都事凡視朝官者本品下視京官在其上
 開寶六年詔以晉王班宰相上語在本紀後齊王廷美
 武功郡王德昭亦如之太宗命宰相班親王上閣門儀
 制宰臣與親王立班分左右各為班首宰臣樞密使帶
 使相或帶郡王并使相作一行總為中書門下班首其
 親王獨行一班準封爵令他官不得參綴祥符元年醜
 宴圖宰臣與使相在東親王及帶使相及郡王在西分
 班坐乃特旨也元祐元年詔太師平章軍國重事文彥
 博已降旨令獨班起居自今赴經筵都堂同三省樞密
 院事並序位在宰臣之上

百官轉對自建隆詔內殿起居日令百官以次轉對限
 以二人其封章於閣門通進復鞠躬自奏宣徽使承旨
 宣答拜舞而出大中祥符末罷景德中復之治平中詔
 增二員熙寧初詔授外任者許轉對訖朝辭監察御史
 裏行張戢程顥言每欲奏事必俟朝旨或朝政有闕及
 聞外事而機速後時則已無及況往復俟報必由中書
 萬一事干政府或致阻格請依諫官例牒閣門求對或
 有急奏即許越次登對元豐中詔尚書侍郎同郎官一
 員奏事郎中員外郎番次隨之並不許獨留身紹聖初
 臣僚言文德殿視朝輪官轉對蓋襲唐制故祖宗以來

每遇轉對待從之臣亦皆與焉元祐間因言者免待從
官轉對續詔職事官權侍郎以上並免自此轉對止於
卿監郎官而已請自今視朝轉對依元豐以前條制重
和元年臣僚言祖宗舊制有五日一轉對者今惟月朔
行之有許朝官轉對者今惟待制以上預焉自明堂行
視朔禮歲不過一再則是畢歲而論思者無幾請遇不
視朔卽令具章投進又諸路監司未經上殿者雖從外
移先赴闕引對方得之官並從其議

百官相見儀太祖乾德二年詔詳定百官進見宰相及
參候長吏儀制翰林學士承旨陶穀等以品秩立差等

或堂謁或庭參或答拜或受叅遇諸途或引避或分路
或斂馬側立須其過累朝更定加詳焉

錄周後太祖受禪下詔曰封二王之後備三恪之賓所
以示子傳孫興滅繼絕夏商之居杞宋周隋之啓介鄘
古先哲王實用茲道矧余涼德歷試前朝雖周德下衰
勉從於禪讓而虞賓在位敢忘於蒸嘗其封周帝爲鄭
王以奉周嗣正朔服色一如舊制已而遷周六廟於西
京越二年鄭王出居房州未幾殂帝輟朝十日素服發
哀於便殿還葬慶陵之側曰順陵謚曰恭帝仁宗屢錄
柴氏後嘉祐四年著作郎何昂奏求唐周之裔以備二

王之後下太常議曰古者立二王後不惟繼絕兼取其明德可法唐室世數已遠於經不合惟周則我受禪之所自義不可廢乃詔推柴氏譜系最長一人歲時親奉周祀給田十頃封崇義公近親以次承襲於是相州兵馬都監柴詠換殿中丞受封爵以祭器給之熙寧四年司馬光言周本郭姓世宗后姪爲郭氏後今存周後則宜封郭氏子孫以奉周祀帝問王安石對曰宋受天下於世宗柴氏也帝曰爲人後者爲之子安石曰爲人後於異姓非禮也豈可以天下之故而易其姓氏所出帝然之重和元年詔謂藝祖受禪于周而三恪之封不及

禮蓋未盡宜於崇義公之外擇柴氏最長見在者以其祖父爲周恭帝後以其孫世爲宣義郎監周陵廟與知縣請給以示繼絕之仁爲國三恪求爲定制淳祐九年又求隋唐及朱氏李氏石氏劉氏郭氏以至吳越荆湖蜀漢諸國之後皆命以官使守其祀

錄先聖後乾德四年以孔子四十四代孫宜爲曲阜縣主簿太平興國三年以宜襲封文宣公累世繼襲語在宣傳景祐二年以宗愿爲國子監主簿襲封至和初太常博士祖無擇言孔子後襲封者在漢魏曰褒成褒尊宗聖在晉宋曰奉聖後魏曰崇聖北齊曰恭聖後周隋

竝封鄒國唐初曰褒聖開元中始追謚孔子為文宣王
 又以其後為文宣公不可以祖謚加後嗣遂詔有司定
 封宗愿衍聖公令世襲仙源縣令舊以孔氏子弟充選
 主祠事治平元年言者請重長民之官遂禁之熙寧中
 以若蒙為新泰縣主簿襲封元祐初詔襲封者改衍聖
 為奉聖無兼他職終身在鄉里主祠事增祀田百頃許
 以其餘均贍族人若蒙弟若虛為家眾宗壽等所舉襲
 封宗壽等仍請自今眾議選擇不必子繼庶幾留意祖
 廟淳睦族人崇寧二年復改奉聖為衍聖宣和三年端
 友襲封紹興二年玠襲封其後以摺以文遠以萬春以

洙終宋世皆襲封主祀事

群臣朝覲出使宴餞未浴五代舊制大臣入覲及被召
 使回客省齋籤賜酒食或十日或七日或五日或一日
 或賜生料有差群臣使回朝見面賜酒食樞密節度使
 使相還朝咸賜宴於外苑見辭日長春殿賜酒五行仍
 設食當直翰林龍圖閣學士以上皇親觀察使預坐真
 宗詔兩省五品尚書省四品諸司三品以上同列出使
 許釀錢餞飲仍休假一日餘官任以休務日餞送
 朝臣時節餽廩太宗雍熙二年重九日賜近臣飲于宰
 相李昉第故事宰相生日賜酒餼中書會輔臣真宗優

寵王旦特賜生日羊三十口酒五十壺米麪各二十斛
令諸司供帳京府具衙前樂於私第許宴其親友及庶
寮自是爲例後旦以廢務非便奏罷會而賜如故又制
大臣正至寒食竝客省齋籤賜羊酒米麪立春賜春盤
寒食神飫錫粥端午糉子伏日蜜沙冰重陽糕竝有酒
三伏日又五日一賜冰其次只賜節料立春奉內朝者
皆賜幡勝元祐二年冬至遣中使賜御筵於宰相呂公
著私第陳教坊樂出御飲器勸酒及暮給燭傳宣令繼
燭皆異恩也高宗於秦檜生日賜宴優詔不允辭語在
本紀其他節序賜予南渡後多權停

外國君長來朝儀凡外國君長來朝先遣使迎勞于候
館皇帝服通天冠絳紗袍設黃麾仗及宮縣大樂御乾
元殿國主及其從臣以次先後就位展拜錫宴于內殿
遇大禮則進爵近臣及刺史正郎都虞候以上皆預
契丹國使入聘開寶八年契丹始講和於是有賀元正
及聖節之使已而中輟及澶淵定盟和好復通有司遂
定契丹國信使副朝見儀注政和詳定五禮有內殿朝
辭宴餞諸儀不幸而殂則爲輟朝云

金國使入聘徽宗知金將滅遼故與通好待之甚厚宣
和中金使來見于宣政殿徽宗臨軒授使者書自後屢

遣使來時引上殿奏事賜予不貲禮遇竝用契丹故事高宗南渡國勢削弱不能舉舊禮故事金使正旦入見百官俱入至是上謂宰臣曰全盛之時神京會同朝廷之尊百官之富所以夸示今暫駐於此事從簡便無庸俱入使人見辭竝賜食于殿門外紹興八年金使議和就驛賜宴十四年以後非遇國喪竝賜宴內殿孝宗時每賀正使赴宴多遇上辛齋禁有司條治平用樂典故以進及生辰使上壽適親郊散齋樞密副使陳俊卿奏不宜用樂詔垂拱上壽止樂正殿猶爲使者權用後三年賀使當朝辭復值散齋帝乃諭館伴以決意去樂及

議所以處之者如使人必以作樂爲言則移宴於館高宗崩帝力行三年之制金賀使至稽舊典當引對使人或許上壽惟輟樂不舉帝特却書幣就館遣行次年再至始用紹興故事移宴于館罷作樂寧宗居慈懿皇后喪待金賀使亦如紹興儀

夏國使入貢自乾德以來夏國歲以正旦聖節入貢凡蕃使見辭同日者先夏國次高麗政和中詔高麗使至復用熙寧例以文臣充接伴使副又升其使爲國信使錫宴內殿往還許上殿禮在夏國上詳見高麗傳

諸國朝貢凡外國自高麗而下有交州宜州黎州諸國

使人見辭大槩相同惟迓勞宴賚之數稍殺其黔州蠻
所謂五姓蕃者見使人獨於後殿而禮又與諸國別云
建隆二年占城國使入貢遇大禮特授檢校少傅加食
邑其後他國之使亦然景德四年交州使人成雅等至
適大宴合光殿真宗以成雅坐遠升其位著優禮之語
在交趾傳建炎以來高麗交趾大理先後求入貢高宗
却之謂不欲以虛名勞民孝宗登極卽詔自今所在州
軍以理論遣毋得以聞

宋史新編卷二十八

宋史新編卷二十九

志十五

明南京戶部主事莆田柯維騏編

禮四

文王伐崇類禡並舉故禡宜居軍禮之首而講武次之
受降獻俘又次之田獵以下亦各以類附焉

禡師祭也軍前大旗曰牙師出則祭後魏出師又建纛
頭旗上太宗征河東分遣潘慎脩出郊祭蚩尤禡牙李
巨源卽北郊望氣壇祭北方天王咸平中詔定禡儀除
地爲壇兩壝置軍牙六纛位版軍牙以白六纛以皂祭
日用剛都部署以下皆戎服將事禮畢焚幣爨鼓又擇

日祭馬祖馬社

閱武太祖太宗征伐四方親講武事故不盡用定儀亦不常其處鑿講武池朱明門外習水戰復築講武臺城西楊村秋九月大閱與從臣登臺觀焉真宗擇含輝門外之東武村為廣場馮高為臺臺上構行宮帝乘馬從官戎服賜窄袍且抵行宮殿前侍衛馬步諸軍陣臺前左右相向步騎交屬且二十里有司奏成列帝升臺御戎帳召從臣坐觀之殿前都指揮使執五方旗以節進退既振旅召從臣宴回御東華門閱諸軍還營復召從臣坐賜飲明日又賜近臣飲於中書諸軍將校飲於營

中內職飲於軍器庫諸班衛士飲於殿門外神宗凡營屯更戍諸軍及畿甸三路民兵皆隨伎藝召見親閱舊以七軍營陣校試而分數不齊前後牴牾命校試官采掇定為八軍法既又定九軍法以一軍營陣即城南好草坡閱之皆有賞賚高宗初以巡幸不果行紹興五年始御射殿閱射藝精者賞有差十四年以後歲以冬月行之號曰冬教孝宗乾道二年冬幸白石教場賜賚將士諸軍權騰鼓舞百姓觀者如山四年復作茅灘教場臨閱犒賞倍之淳熙四年十二月又大閱于茅灘十年十一月大閱于龍山十六年十月大閱于城南寧宗初

在諒闇令宰執於大教場教閱其後或茅灘或候潮門外教場一再幸焉

受降獻俘太祖平蜀孟昶降詔約前代儀制為受降禮先一日設御坐仗衛于崇元殿如元會儀其日大陳馬步諸軍于天街左右昶及官屬素服紗帽北向跪奉表待命乃宣制釋其罪昶等再拜呼萬歲跪受所賜襲衣冠帶改服入謝昶升殿安撫之禮畢百官稱賀遂宴近臣及昶于大明殿嶺南平劉鋹就擒詔撰獻俘禮有司率武士係鋹等白練露布前引告太廟太社乃獻俘御前宣露布法官奏以所獻俘付有司上召鋹詰責釋

之事具世家及南唐平帝以李煜奉正朔非劉鋹拒命比寢露布弗宣遣閣門使承制釋之太宗征太原受劉繼元降釋其罪繼元至京師詔告獻太廟行謁見禮既命以官故不稱俘焉元符二年西蕃王權撻邈川首領瞎征等降大抵如國初儀政和議禮局上受降儀開禧三年四川宣撫副使安丙函逆臣吳曦首并違制初造法物來獻禮官具獻馘典故行奏獻之禮禮畢梟於市三日付大理寺藏於庫端平元年金亡四月京湖制置司以完顏守緒函骨來上差官奏告宗廟社稷如儀田獵太祖建隆二年始校獵于近郊其後多以秋冬或

正月田於四郊從官或賜窄袍煖鞞親王以下射中者賜以馬太宗將北征因閱武獵近郊以多盜獵狐兔者命禁之有衛士奪人獐當死帝曰若殺之後世必謂我重獸而輕人特寬其罪帝謂從臣曰臘日出狩以順時令緩轡從禽非荒也回幸講武臺賜群臣飲雍熙二年獵西郊親射走兔五詔以薦宗廟語在本紀帝雅不好弋獵端拱元年冬詔罷近甸游畋五坊所畜鷹犬並放之諸州毋以為獻已而趙保忠獻鶻一號海東青詔還賜之遇獵日但命諸王略畋近郊而五坊之職廢矣真宗咸平三年亦嘗狩于郊薦所獲于廟大中祥符二年

詔量留五坊鷹鶻備諸王展禮餘悉縱之仁宗時言者請修此禮事下樞密院倣前制奏為定式以所獲薦廟既而召父老田夫勞問賜以飲食及五坊軍士賜賚有差宰相賈昌朝等曰乘輿一出而四美具請付史館謂昭孝講武養老勸農也明年復獵於城南東韓村後以諫者多罷獵近甸自是終靖康不復講

打毬本軍中戲太宗令有司詳定其儀從官乘馬分朋而入宗室節度使以下服異色繡衣左朋黃欄右朋紫欄打毬供奉官左朋服紫繡右朋服緋繡三月會鞠大明殿帝乘馬一再擊乃命諸王大臣馳馬爭擊帝得籌

牙史新編卷二十九
從官呼萬歲群臣得壽則唱好得壽者下馬稱謝凡三
籌畢乃御殿召從臣飲又有步擊者乘驢騾擊者時令
供奉者朋戲以爲樂云

敕日伐鼓建隆元年司天監言日食五月朔請掩韞戈
兵鎧冑有司請皇帝避正殿素服百官各守本司用牲
太社如故事嘉祐六年六月朔日食詔禮官驗詳典故
皇帝毋視事百官廢務守司於郊社伐鼓讀祝其詞以
責陰助陽之意如霧晦不見卽不伐鼓遂爲定制至政
和有合朔伐鼓儀

凶禮凡喪有服所以致哀也已而葬焉謚焉祔之廟焉

禮之備也高宗宮中行三年喪孝宗力持三年之制山
陵篇載之已詳不必若舊史特表而出之爲服紀也其
上陵忌日漢儀如吉祭宋制是日設素饌輟樂舉哭素
服行事故亦爲凶禮而外國及大臣士庶之喪制附焉
周官五禮凶居次茲列於末依唐制也

山陵太祖建國號僖祖曰欽陵順祖曰康陵翼祖曰定
陵宣祖曰安陵安陵後改卜鞏縣鄧封村帝及文武護
送者皆服緦順祖翼祖皆葬幽州至真宗始命營奉二
陵遂以一品禮葬河南縣其皇堂陵臺神牆乳臺鵲臺
等制比安陵稍殺尋改定陵曰靖陵開寶九年十月太

祖崩遺詔以日易月皇帝三日而聽政二十七日而服除羣臣敘班殿庭宰臣宣制發哀畢太宗卽位號哭見羣臣羣臣稱賀復奉慰盡哀而退成服後羣臣朝晡臨三日大小祥禫除朔望皆入臨奉慰內出遺留物頒賜諸臣親王遣使齎賜方鎮將葬命宰臣爲山陵使及撰陵名哀冊文凡天子初崩未有謚稱大行皇帝將葬乃有謚太宗卽位之明年三月十七日羣臣奉太祖謚號冊寶告南郊明日讀于靈坐前四月十日啓攢宮帝與羣臣皆服如初喪朝晡臨殿中退易常服出宮城十三日發引帝衰服奠哭羣臣入臨辭於都城外二十五日

掩皇堂二十九日虞主至奉安于大明殿五月十九日有司奉神主至太廟近臣題謚號升祔禮畢群臣奉慰陵在鞏縣祔宣祖名曰永昌自是大行皇帝服除而謚而葬而祔爲常制至道三年三月太宗崩真宗散髮號擗有司定散髮之禮皇帝皇后諸王公主縣主諸王夫人六宮內人竝左被髮皇太后全被髮以十月葬永熙陵其靈駕發引擎昇凶仗法物凡用兵士力士萬二千二百人餘竝如昌陵制乾興元年二月真宗崩時契丹已通好遣使告哀及以遺留物遺焉遂爲故事司天監定卜永安縣臥龍岡詔雷允恭覆按事具本紀以十月

葬名陵曰永定先時仁宗與輔臣議以天書狗葬謂先帝尊道膺受靈貺殊尤之瑞屬于元聖不可留于人間發引日以天書先導焉嘉祐八年三月仁宗崩英宗立喪服制度竝如定陵以十月葬永昭陵先是翰林學士王珪言天子之謚當集群臣於南郊告天議定乃連奏近制惟詞臣撰議庶僚不得參聞乞依舊典從之治平四年正月英宗崩八月葬永厚陵如故事元豐八年三月神宗崩九月葬永裕陵祕書正字范祖禹言先王制禮君父皆斬衰三年國朝自祖宗以來外廷雖用易月之制而宮中實行三年之喪今宜令群臣竝酌古禮行

之禮部尚書韓忠彥等議朝廷典禮時世異宜不必循古若先王之制不能盡用則當循祖宗故事及先帝遺制從其議元符三年正月哲宗崩山陵制度竝如元豐八月葬永泰陵紹興七年正月徽宗及二后崩問至高宗號慟擗踊終日不食宰臣張浚等力請始進糜粥詔立重成服禮官言舊制沿邊州軍不許舉哀緣諸大帥皆國家腹心瓜牙之臣休戚一體至於將佐皆懷忠憤宜就所屯自副將而上成服日朝晡臨故校哭於本營命王倫等爲奉迎梓宮使時知嚴州胡寅疏請衰麻枕戈致喪三年衣墨臨戎以化天下張浚連疏謂喪服不

可卽戎遂詔遵舊制外廷以日易月宮中仍行三年喪御朝則淺素淺黃戶部尚書章誼等言梓宮未還又廢謚冊請依仁宗英宗虞祭畢而後卒哭卒哭而後祔廟仍於小祥前一日行之異時梓宮改葬更不立虞主於是上尊謚以十二月祔神主于臨安太廟九年以禮官請先建陵名曰永固以便薦獻梓宮初葬五國城十二年金人還梓宮高宗易服以迎既入境卽承以槨納袞冕輦衣於槨中不復改斂十月掩攢於會稽昭慈攢宮西北改陵名曰永祐命諸州軍各建報恩光孝寺觀一所以崇奉祐陵香火三十一年五月欽宗崩問至悉如

徽宗典禮宮中仍行三年喪隆興元年欽宗服除天申節當舉樂禮官黃中援春秋賊未討不書葬以奏事遂寢是年五月大祥孝宗衰服詣几筵易祥服行祥祭遙上陵名曰永獻金人葬之鞏原淳熙十四年十月八日高宗崩孝宗號慟擗踊踰二日不進膳尋諭宰執王淮欲如晉武魏文行三年喪不妨聽政淮等奏晉武雖有此意後來亦不能行帝曰自我作古何害乃出內批朕衰經三年群臣行易月之令二十日小祥王淮等乞俯從禮制上流涕曰大恩難報情所未忍明日還內帝衰經御輦設素仗軍民見者咸感泣十一月朔詣德壽宮

自是朔望皆如之。二日大祥，帝白布巾袍，御延和殿，詣宮，衰經而杖如初。四日禫祭畢，百官釋服。明日百官請聽政，不允。越三日，百官三上表，引康誥被冕服出應門等語以證。詔俟過祔廟，勉從所請。十五年正月十八日，百日。又詣宮行焚香禮。三月丙寅，掩攢于會稽。四月壬申，親行奉迎虞主禮。自是七虞八虞九虞卒哭，奉辭皆如之。大臣言虞祭吉禮，合用鞞袍。上曰：只用布折上巾，黑帶布袍可也。丙戌祔廟，帝堅欲終制。語在本紀。蓋三年之制，斷自帝心。執政近臣皆主易月之說。惟敕令所刪定官沈清臣再疏，願堅主聽帝納用焉。既小祥，會慶

節，免金使入見，却禮幣。既大祥，賀正旦使至，見于垂拱殿之東楹，素幄，詔免行賀，以禮物付有司。次年會慶節，使至，仍見于東楹，詔北使百官詣閣門拜表起居，免入賀。凡值吉禮，悉罷樂不舉。及大饗，起居舍人鄭僑奏：不可廢樂。乃詔降神奠玉幣，奉俎酌獻，換舞徹豆，送神，並依典禮作樂外，皇帝獻官盥洗登降等樂皆備而不作。其攢宮遺誥從儉約，却諸路貢獻。上陵名曰永思。紹熙五年六月，孝宗崩，光宗以疾在內，成服。太皇太后代皇帝行禮。寧宗即位，詔行孝宗喪三年。有司請易月，外用漆紗淺黃蓋，循紹興以前之制。朱熹初至，不以為然。

奏言今已往之失不及追改惟有將來啓攢發引禮當復用初喪之服則其變除之節尚有可議望明詔禮官稽考禮律豫行措定其後詔中外百官皆以涼衫視事蓋用此也方朱熹上議時門人有疑者未有以折之後讀禮記正義喪服小記爲祖後者條因自識於本議之末其略云準五服年月格斬衰三年嫡孫爲祖法意甚明而禮經無文但傳云父沒而爲祖後者服斬然而不見本經未詳何據但小記云父祖沒而爲祖母後者三年可以旁照至爲祖後者條下疏中所引鄭志乃有諸侯父有廢疾不任國政不任喪事之問而鄭答以天子

諸侯之服皆斬之文方見父在而承國於祖服向來上此奏時無文字可檢又無朋友可問故大約且以禮律言之亦有疑父在不當承重者時無明白證驗但以禮律人情大意答之心常不安歸來稽考始見此說方得無疑乃知學之不講其害如此而禮經之文誠有闕略不無待於後人向使無鄭康成則此事終未有所斷決不可直謂古經定制一字不可增損也孝宗攢宮在永思陵之西上陵名曰永阜光宗陵曰永崇寧宗陵曰永茂理宗陵曰永穆度宗陵曰永昭端宗陵曰永福皇后園陵凡后崩未葬亦稱大行皇后既諡而葬而祔

與天子同太祖建隆二年六月昭憲皇太后杜氏崩太常禮院請行以日易月之制二十七日禫除服吉心喪終制從之然宮中自孝明皇后而下皆服喪三年迄宋世遵行焉既議謚禮官上言唐憲宗母王太后崩有司集議以謚狀讀于太廟然後上之周宣懿皇后謚卽有司撰定奏聞未嘗集議亦不告于郊廟脩謚冊畢始告廟讀于靈坐前詔從周制乃九月十六日羣臣奉冊寶告太廟翌日上于櫝宮十月葬安陵十一月四日神主祔太廟乾德二年改卜安陵奉冊寶改謚讀于陵次合葬焉太祖孝惠賀皇后未受禫而薨及孝明王皇后崩

適安陵改卜有司上二后謚並陪葬儀物差殺安陵孝惠又殺孝明孝章宋皇后至道元年疾劇遷于故燕國長公主第及崩太宗素服舉哀輟朝五日羣臣不成服語在王禹偁傳既上謚以歲忌權攢于趙村沙臺三年乃葬昌陵之北如孝明制太宗淑德尹皇后懿德符皇后早薨葬安陵之西北李賢妃生真宗是爲元德皇后葬熙陵明德李皇后喪服依杜太后故事葬熙陵之西初以歲忌權攢京師語在趙安易傳真宗章懷潘皇后早薨陪葬孝章于昌陵章穆郭皇后景德四年崩皇帝七日釋服後改用十三日葬熙陵之西北李宸妃生仁

宗是爲章懿皇后明道元年薨殯斂用一品禮葬洪福
禪院之西北命參知政事晏殊撰墓銘及章獻明肅劉
皇后崩乃得追冊改葬定陵之西北章獻之喪宗室削
杖不散髮百官朝晡臨內外命婦朝臨並三日告哀遼
夏賜遺留物葬定陵之西北改園陵曰山陵後慈聖宣
仁欽聖亦如之楊淑妃爲章惠皇后明道三年薨禮官
請皇帝服總三日仁宗以保佑恩加服小功五日而除
葬定陵之西北諸后廟祀見前后廟篇仁宗慈聖光獻
曹皇后元豐二年崩如章獻上四謚典禮加隆葬昭陵
神主祔仁宗室英宗宣仁聖烈高皇后元祐八年崩宣

遺詔園陵制度務遵儉省餘並如章獻故事哲宗詔依
慈聖之制既上四謚將題神主禮官言章獻明肅皇后
神主書姓劉氏合依故事葬厚陵神主祔英宗室神宗
欽聖獻肅向皇后建中靖國元年崩禮官議山陵法物
依元豐二年慈聖故事上四謚葬裕陵德妃朱氏生哲
宗是爲欽成皇后賢妃陳氏生徽宗是爲欽慈皇后徽
宗先後備禮追冊葬裕陵欽聖與欽慈同祔廟欽成後
祔躋於欽慈之上哲宗昭懷劉皇后政和三年崩詔依
欽成皇后及孝章皇后故事參酌裁定葬泰陵昭慈聖
獻孟皇后紹興元年崩高宗服菴遺詔擇近地權殯俟

息兵歸葬梓取周身以便遷奉乃權殯于會稽上亭鄉
攢宮上四謚祔廟在昭懷之上徽宗顯恭王皇后大觀
二年崩援真宗章穆故事服七日葬裕陵之次祀于別
廟顯肅鄭皇后同徽宗訃聞高宗詔立重成服有司請
先行上謚祔廟之禮於是顯恭改謚與后同祔徽宗室
及梓宮還合攢于祐陵顯仁章皇后自金還紹興二十
九年崩如故事攢祐陵之西神主祔徽宗室欽宗仁懷
朱皇后北遷不知崩問慶元四年始上謚神主祔欽宗
室高宗憲節邢皇后亦崩五國城同徽宗訃聞高宗行
釋服之祭梓宮還攢于昭慈攢宮之西北及高宗祔廟

后改謚自別廟升祔憲聖慈烈吳皇后慶元三年崩光
宗以太上皇承重寧宗服期明年上四謚攢于思陵神
主祔高宗室孝宗成穆郭皇后早薨既受禪追冊改殯
成恭夏皇后乾道三年崩攢于臨安南山之脩言寺及
孝宗祔廟后與成穆俱改謚自別廟升祔成肅謝皇后
開禧三年崩殯阜陵之北吏部尚書陸峻言伏觀列聖
在御間有諸后上仙緣無山陵可祔是致別葬若上仙
在山陵已卜之後無有不從葬者其他諸后葬在山陵
之前神靈既安並不遷祔惟元德章懿二后方其葬時
名位未正續行追冊其成穆皇后孝宗登極卽行追冊

宋史新編卷二十九
改殯所為攢宮典禮已備與元德章懿事體不同所以
更不遷祔竊攢前件典禮祇緣喪有前後勢所當然其
於禮意却無隆殺今來從葬阜陵為合典故從之神主
祔孝宗室光宗慈懿李皇后慶元六年崩攢于南山之
脩吉寺寧宗恭淑韓皇后亦以是年崩攢于南山之廣
教寺恭聖仁烈楊皇后紹定五年崩葬茂陵祔神主于
寧宗室宋制后先帝而崩者祀別廟及帝崩乃升祔舊
史本紀載慈懿恭淑二后崩即祔神主於太廟恐誤也
凡皇太后祀別廟則存太字祔太廟則否蓋稱太者義
繫於子稱后者義繫於夫况在太廟以厭降也蓋自唐

已然矣

濮安懿王園廟治平三年詔置園令一人園制用一品
三夫人別有塋域元豐詔遷祔濮園語在本紀南渡後
主奉祠事以嗣濮王為之園令一員以宗室為之

秀安僖王園廟紹熙元年三月詔秀王襲封等典禮依
濮安懿王故事避秀安僖王名一字仍置園廟四月詔
皇伯滎陽郡王伯圭除太保嗣秀王以奉王祀

莊文太子喪禮乾道三年七月九日皇太子薨設素幄
于太子宮正廳之東皇帝服期以日易月十三日而除
皇太子妃及本宮人並斬衰三年文武百官成服一日

而除本宮官僚並服齊衰三日臨七日而除葬日仍服
 衰葬畢而除攢于寶林院法堂先期大臣奉謚冊寶告
 太子柩前其夕帝詣東宮行焚香之禮次日乃發引四
 年小祥日帝不視事其日先命從官一員常服詣太子
 神坐前行奠酌禮五年七月九日大祥亦如之景獻太
 子嘉定十三年八月薨其發哀制服攢宮並如莊文
 上陵之禮古者無墓祭秦漢以降始有其儀至唐復有
 清明設祭朔望時節之祀進食薦衣之式五代諸陵遠
 者令本州長吏朝拜近者遣太常宗正卿或因行幸親
 謁宋初倣其制春秋命宗正卿朝拜至乾德三年始令

宮人詣陵上冬服歲以為常開寶九年太祖幸西京過
 鞏縣謁安陵奠獻雍熙二年有司議曰按開元禮春秋
 二仲月司徒司空巡陵不設牲牢之祀今請如宗廟薦
 享少加裁減除不設登鉏牙槃食及太常登歌外餘悉
 如大祠從之景德三年真宗朝諸陵有司議服淡黃袍
 詔特素服行事沿途不舉樂大中祥符四年正月祀汾
 陰經鞏縣謁諸陵亦如之是歲命禮官定春秋二仲遣
 官朝陵儀注以祭服行事故事車駕詣陵謂之親謁南
 渡之後此禮不舉故上陵或曰省視或曰保護或曰薦
 獻或曰祭告或曰致祭或曰望祭或曰脩奉悉遣官行

宋史新編卷三十九
世
紹興三年正月禮官言春秋二仲薦獻諸陵乞于行在
法惠寺設位望祭自是爲定制九年正月以金國割還
故地遣官修奉諸陵以方庭實爲二京宣諭使庭實朝
陵寢自昌陵以下皆遭發掘秦陵尤暴露庭實解衣覆
之然不敢以實聞明年禮部只奏求安求昌求熙三陵
神臺豐裂合行補飾其後兵部侍郎張壽詣陵還高宗
詰其狀壽亦諱其事只云萬世不可忘此賊且言臣區
區愚忠願明詔有司異時求固陵凡金玉珍寶盡斥不
用播告天下可保無虞上嘉納之金人叛盟汴洛復爲
金有端平元年正月史嵩之以滅金聞遂遣太常主簿

朱揚祖等朝謁八陵揚祖還以圖上進理宗問諸陵相
去幾何及陵前澗水新復揚祖悉以對帝忍涕太息南
渡諸陵俱在會稽幼帝入閩廣元僧楊璉直加發之義
士爲改葬焉

忌日唐初始著罷樂廢務及行香修齋之文其後又胡
望停朝天祐初始令百官詣閣奉慰宋循其制惟宣祖
昭憲皇后爲大忌乾德二年禘于太廟其日惠明皇后
忌有司言唐時祀先農蜡百神與二宗忌同日樂縣而
不作况僖祖同廟連室而在諱辰詎可輒陳金石之奏
伏望依禮縣而不作咸平中有司將設春宴金明池習

宋史宗卷二十九
水戲開瓊林苑縱都人游賞帝以是月太宗忌月命詳
定故事以聞史館檢討杜鎬等言忌日不樂嘗載禮經
忌月徹縣實無典故其春宴及池苑竝合舉樂景德元
年北征凱旋是日以懿德皇后忌詔徹鹵簿鼓吹禮官
議曰武王伐紂在諒闇中猶前歌後舞况春秋之義不
以家事辭王事其還京日法駕鼓吹音樂竝請振作仁
宗時祕閣校理裴煜奏大祠不宜避國忌禮官議廟祭
與別廟諸后忌同日者作樂在太廟仍依舊制若祠天
地日月九宮太一及蜡百神竝請作樂社稷以下諸祠
則否翰林學士王珪等以爲社稷國之所尊若與別廟

諸后忌同者亦不去樂詔可
外國喪禮凡告哀使至皇帝輟朝發哀成服有司擇日
設次於內東門之北隅皇帝向其國而哭五舉音而止
仍遣使祭奠弔慰其宰臣樞密使已下待制已上竝就
使者於都亭驛弔慰嘉祐三年正月契丹告國母哀爲
輟朝七日使人入見皇帝問云卿離北朝日姪皇帝悲
苦之中聖躬萬福朝辭日卽云皇帝傳語北朝姪皇帝
嬪太皇太后上僊遠勞使人訃告春寒善保聖躬
外國弔喪遣官充祭奠使副別遣官充皇帝弔慰使副
若皇太后在又別遣官充皇太后弔慰使副其日祭奠

弔慰使副並素服詣神御坐前階下舉哭殿上皆哭再拜訖升殿上香奠茶酒副使跪讀祭文降階復位又舉哭再拜既畢朝見皇太后殿上舉哭左右皆哭弔慰使升殿進書朝見皇帝亦如之使副以下賜賚有差諸臣之喪國制諸王公主宗室將軍以上有疾皆乘輿臨問如小疾在家或幸其第有至三四者其宮邸在禁中多不時而往惟宰相使相駙馬都尉疾亟幸其第或賜勞加禮焉太常新禮宰相樞密宣徽使參知政事樞密副使駙馬都尉卒皆臨幸奠醑及發引乘輿或再往其儀千牛將軍四人執戈一人執桃一人執芻前導皇

帝改素服就臨喪主內外再拜皇帝哭十五舉音喪主內外皆哭皇帝詣祭所三奠酒喪主已下又再拜皇帝退止哭從官進名奉慰皇帝改常服還內

輟朝之制文武官一品二品輟視朝二日於便殿舉哀掛服三品輟朝一日不舉哀掛服然車駕就臨并輟朝日數亦有特恩不拘品秩康定元年臺官言卿監職任踈遠恩禮不稱自後遂不輟朝

舉哀掛服尚舍設次於內殿其後皆於後苑壬地所司設舉哀所幕殿周以簾帷色用青素其日皇帝詣幕殿服素服哭十五舉音其值國喪則罷真宗乳母奉國延

壽保聖夫人卒禮官請發哀從之高宗於劉光世張俊秦檜之喪皆為臨奠然設幄舉哀成服之禮未之行也孝宗始為皇伯母秀王夫人行焉

輟樂太平興國七年十月七日乾明節選定二十二日大宴二十日參知政事竇侁卒明日太宗親臨其喪還宮即命罷宴有司奏伏以百司告備六樂在庭睿聖至仁聞哀而罷是以顯君父愛慈之道勵臣子忠孝之心請宣付史館傳錄美實天禧二年九月長春殿宴餞節度使張旻以王且在殯不舉樂嘉祐六年三月宰臣富弼母薨禮院上言一人向隅滿堂嗟戚今宰臣新在苦

塊欲乞罷春宴聲樂以表憂恤詔并罷春宴

賻贈自中書樞密而下至兩省五品三司三館職事內職軍校并執事禁近者亡姒及父母近親喪皆有贈賜宗室朞功祖免乳母殤子及女出適者各有常數其特恩加賜者各以輕重為隆殺焉

詔葬禮院例冊諸一品二品喪敕備本品鹵簿送葬者以少牢贈祭於都城外加璧東帛深青三纁二又按會要勳戚大臣卒多命詔葬遣中使監護官給其費墳所儀具皆有等差亦有特恩加隆者熙寧著新式禁使臣過取喪家饋遺元祐中詔臣僚父母無故十年不葬者

御史臺彈奏吏部限滿儉察不得與關升磨勘

定諡王公及職事官三品以上卒贈官太常禮院取行

狀撰議考功審覆判都省集合省官參議具上中書門

下宰臣判準始錄奏聞蘊德立園聲實明著雖無官爵

亦奏賜諡曰先生國初贈官三品不得諡真宗以陳彭

年議遂許諡為定制太平興國八年詔增周公諡法五

十五字美諡七十一字為一百字平諡七字為二十字

惡諡十七字為三十字其沈約賀琛續廣諡盡廢

士庶人喪禮開寶三年詔禁喪葬之家不得用道釋威

儀及裝束異色人物前引太平興國七年重定士庶喪

葬制度禁用音樂及欄街設祭身無官而用方相者詔
葬設祭者不在此限景德二年定文武官亡歿諸寺擊
鐘之制不得踰分紹興二十七年禁火化飭守臣措置
荒閒之地以給貧民收葬

臣為君服宋制有三等大臣加竹杖入局治事並不易

服士庶於本家素服三日而除婚嫁服除外不禁文武

臣僚之家至山陵祔畢乃許嫁娶

丁父母憂淳化五年詔禁文武官子弟有因父亡兄沒

特被敎用未經百日不得趣赴公參其有冒哀求仕釋

服從吉者御史臺并糾之天禧四年御史臺言文武官

併丁憂者相承服五十四月別無條例下太常禮官議
依舊禮改正慶曆三年詔自今三司副使已上非領邊
寄並聽終制武臣非在邊而願解官者聽天聖五年侍
講學士孫奭言諸司執守服制詞旨俚淺如外祖甲於
舅姨大功加於嫂叔顛倒謬妄難可遽言臣於開寶正
禮錄出五服年月并見行喪服制度編附假寧令請下
兩制禮院詳定從其議而喪服親踈隆殺之紀始有定
制云
子為嫁母王博文事見本傳景祐中因集賢校理郭禎
為嫁母解官行服禮官宋祁等議不一帝詔凡為出母

嫁母不拘子為父後之條並聽解官以申心喪

子為生母真宗時樞密使王欽若言祕閣校理聶震丁
所生母憂嫡母尚在望特免持服禮官詳議震當解官
行服心喪三年神宗詔御史臺審決秀州軍事判官李
定追服所生母喪御史臺言定未嘗請解官止以父老
乞還侍養宜依禮制追服時王安石定擢為太子中
允而言者俱罷免

婦為舅姑乾德三年判大理寺尹拙議從周服右僕射
魏仁浦等奏議曰舅姑與父母一也而古禮有暮年之
說至於後唐始定三年之喪在理為當况五服制度前

代增益甚多按唐會要嫂叔無服太宗令服小功曾祖
父母舊服三月增為五月父在為母服甚高宗增為三
年婦為夫之姨舅無服玄宗令從夫服况孝明皇后為
昭憲太后服喪三年足以為萬世法欲望自今婦為舅
姑服竝如後唐之制其三年齊斬一從其夫
嫡孫承重天聖四年大理評事杜杞言祖母鍾媿竝無
服重子婦餘孤孫七人臣最居長今已服斬衰即未審
解官以否禮院言按禮喪服小記曰祖父卒而後為祖
母後者三年正義曰此論嫡孫承重之服祖父已卒又
遭祖母喪故云為祖母後也又按令文為祖後者卒為


祖母祖父歿嫡孫為祖母承重者齊衰三年合解官依
禮令寶元二年集賢校理薛紳奏請祖母服制蓋其先
臣耀卿所生母也禮官言薛紳不為祖後受重於父合
申三年之制同知太常禮院王洙奏駁耀卿為別子始
祖紳繼別之後為大宗不可輒服父所生庶母三年之
喪以廢始祖之祭也又詔太常禮院與御史臺詳定言
耀卿既亡紳受重代養當解官持齊衰三年之服詔從
之皇祐元年大理評事石祖仁奏叔從簡為祖父服後
四十日亡乞下禮院定承祖父重服禮官宋敏求議曰
自開元禮以前嫡孫卒則次孫承重况從簡為中子已

卒而祖仁為嫡孫乎祖仁宜解官斬衰三年著為定式
熙寧八年禮院請為祖承重者依封爵令於是禮房詳
定周禮封爵適子死雖有諸子猶令嫡孫傳重至於商
禮則嫡子死立眾子然後立孫今既不立宗子又未嘗
封建國邑則嫡孫喪祖不宜純用周禮若嫡子死無眾
子然後嫡孫承重即嫡孫傳襲封爵者雖有眾子猶承
重時知廬州孫覺以嫡孫解官持祖母服覺叔父在有
司以新令乃改知潤州元豐三年太常丞劉次莊請祖
母亡有嫡曾孫次莊為嫡孫同母弟在法未有庶孫承
重之文詔下禮官立法自今承重者嫡子死無諸子即

嫡孫承重無嫡孫嫡孫同母弟承重無母弟庶孫長者
承重曾孫以下準此其傳襲封爵自依禮令

雜議大中祥符八年廣平公德彝聘王顯孫女將大歸
而德彝卒疑其禮制禮官援曾子問女合服斬衰於室
既葬而除或未葬但出櫛即除之舊制期喪百日內妨
應試士人病之多有冒哀被罪者天禧四年以晁迥言
詔卑幼期服不妨取解天聖七年興化軍進士黃價赴
舉有叔為僧疑所服禮官言檢會敕文甚周尊長服不
得取應又禮為叔父齊衰朞外繼者降服大功黃價合
比外繼降服之制皇祐四年吉州司理參軍祝紳幼孤

鞠於兄嫂已嘗為嫂持服兄喪又請解官持喪有司以
 為言仁宗曰近世蓋有匿親喪而干進者紳雖所服非
 禮然不忘鞠養恩亦可勸也候服闋日與幕職知縣
 繼絕熙寧二年直史館蔡延慶父褒故太尉齊之弟也
 齊初無子子延慶後齊有子而褒絕請復本宗禮官以
 請許之元豐中國子博士孟開請以姪孫宗顏為孫據
 晉侍中荀顛無子以兄之孫為孫從之哲宗詔宗室居
 父母喪者毋得乞為繼嗣



宋史新編卷二十九

天保三

